

Volonterizam, kao jedan od najbitnijih elemenata razvoja građanskog društva i omladinskih politika, je veoma slabo ili čak nikako podržan od strane lokalnih ili državnih institucija u Bosni i Hercegovini. Mladi ljudi koji bi željeli da posvete dio svog slobodnog vremena volonterskom radu, kao doprinos razvoju lokalne zajednice, u samom startu su onemogućeni. Većina organizacija koje promovišu i/ili realizuju volonterske programe se susreću sa teškoćama u realizaciji istih iz razloga nedostatka adekvatne podrške, ali ponajviše zbog nepostojanja zakonske regulative o volonterizmu i njegove prepoznatljivosti u društvu.

---

Pored toga, na nivou Bosne i Hercegovine ne postoji strategija o razvoju volonterizma u okviru formalnog i neformalnog obrazovanja, kao ni u okviru lokalnih zajednica. Postoje pozitivni primjeri u ovom smjeru, kao što je uvođenje volonterizma u formalno obrazovanje u srednjim školama Republike Srpske u okviru časova odjeljenske zajednice, kao rezultat rada i saradnje Omladinskog Komunikativnog Centra i Republičkog pedagoškog zavoda RS. Takođe, pojedine lokalne vlasti u BiH su prepoznale snagu volonterizma, te istu podržavaju kroz finansijsku ili druge načine podrške, ali ti slučajevi su rijetki.

---

Na osnovu svega navedenog pokrenuta je inicijativa za uspostavu zakona o volonterizmu koji ima cilj da ublaži postojeće probleme i poteškoće razvoja volonterizma, kao i da podstiče i razvija njegov uticaj na razvoj građanskog društva u BiH. U 2004. godini je osnovana radna grupa za izradu zakona, kao jedna od preporuka jednodnevne konferencije o volonterizmu koja je održana u Sarajevu 30.06.2004. godine, a kao slijed svih događaja nastao je i ovaj projekat koji je imao cilj da podrži čitav ovaj proces kroz svoje specifične aktivnosti i metodologiju. U okviru projekta „Razvoj volonterizma u BiH“ je po prvi put održana i Državna konferencija o volonterizmu u decembru 2004. godine u Banja Luci na kojoj su učestvovali predstavnici vladinog i nevladinog sektora i drugih međunarodnih institucija, organizacija i donatora.

Nakon završetka prve faze projekta i njegovih uspješnih rezultata pokrenuli smo i II fazu projekta koji je imao za cilj nastavak promocije volonterizma i njegovog zakonskog okvira, kao i pružanje podrške lokalnim volonterским inicijativama koje su imale fokus na davanje doprinosa u rješavanju pitanja i/ili problema socijalno ugroženih kategorija stanovništva.

---

U ovoj brošuri su opisane aktivnosti i rezultati koji su postignuti tokom realizacije II faze ovog projekta. OKC će i dalje u saradnji sa raznim donatorima, nevladinim organizacijama i predstavnicima vladinog sektora raditi na promociji volonterizma i uspostavljanja njegovog zakonskog okvira.